



## **Redusaun ba kresimentu rejional subliña urjénsia ba paradigma polítika makroekonómiku foun**

Ho Ázia no Pasífiku hatudu hela sinál estrés tanba inserteza persistente iha nasaun iha dezenvolvimentu, tempu ona atu orienta fali polítika makroekonómiku atu responde ba impedimentu estrutural ba kresimentu liuhosi promosaun dezenvolvimentu inkluzivu no sustentavel iha rejiaun ida-ne'ebé hanesan hela-fatin ba katoluk rua hosi mundu nia ema-kiak ho dezigualdade rendimentu ne'ebé haboot bá beibeik mezmuké prosperidade sa'e nafatin.

Hanesan resposta ba mensajen hosi lider mundu nian iha Konferénsia Nasoens Unidas nian kona-ba Dezenvolvimentu Sustentavel iha Juñu 2012, koñesidu nu'udar Rio+20, atu adota polítika makroekonómiku hateke-ba-oin atu bele realiza "futuru ne'ebé ita-hotu hakarak", *Levantamentu* ne'e hato'o argumentu forte atu hapara dékada barak nia neglijénsia ba polítika makroekonómiku sira-nia papél iha dezenvolvimentu.

Xoke presu petróleu iha dékada 1970 no krize deve América Latina nian iha dékada 1980 kontribui ba importánsia atu halo alvu ba inflasaun relasiona ba papél iha distribuisaun no dezenvolvimentu hosi polítika fiskál ho fiar katak buat-ne'e bele di'ak ba kresimentu ne'ebé, tuir nune'e, sei kria rekursu ne'ebé presiza hodi hamenus kiak nomós ba objetivu dezenvolvimentu sira-seluk.

Maibé, sei iha baze empíriku uitoan de'it ba fiar hanesan ne'e. Ba rain sira ne'ebé iha inflasaun dijitu ida-de'it no defísitu orsamentu ki'ik mós la aguenta hasoru krize ekonómiku no sira-nia dezempeñu kresimentu mós ladún forte. Iha sorin seluk, **República Korea** haree kresimentu réal hanesan porsentu 8 iha dékada 1960 no 1970 sira enkuantu iha mós inflasaun dijitu-duplu no **Indonézia** hatudu kresimentu porsentu 7,7 durante dékada 1970 ho inflasaun liu porsentu 17. Sira mós haree redusaun rápido ba pobreza – porezemplu, hosi maizumenus porsentu 60 tun to'o porsentu 11 iha Indonézia. Durante tinan foin liubá, **Kirgizistaun, República Demokrátika Povu Lao nian, Mongólia, Srilanka, Tajikistaun no Uzbekistaun** hatudu kresimentu liu porsentu 5 mezmuké iha nivel inflasaun relativamente aas.

Iha evidénsia forte katak investimentu sosiál públiku bele estimula kresimentu hanesan evidente iha transformasaun ekonómiku dramátiku iha Ázia Leste ne'ebé hahú iha dékada 1960 ho provizaun edukasaun bázika universál ne'ebé halo parte krusiál. Estudu ida kona-ba Ázia no Ázia Súl-Leste hatudu katak aumentu porsentu 1 ba tinan eskolarizasaun medianu bele hasa'e kresimentu PIB entre porsentu 0,24 no porsentu 0,45.

Garantia ba empregu, seguransa rendimentu di'akliu, asesu ba kuidadu saúde, edukasaun no fonte enerjia modern no efisiente bele hakbiit ema tokon atus-ba-atus ne'ebé marjinalizadu ekonomikamente no sosialmente iha rejiaun Ázia-Pasífiku ne'ebé sei kontribui ba kresimentu PIB no sai forsa foun ba demanda konsumu doméstika.

*Levantamentu* ne'e halo estimasaun kona-ba investimentu rekízitu iha rain Ázia-Pasífiku sanulu atu finansia pakote polítika hirak atu haforte pilár sosiál no ambiental ba dezenvolvimentu sustentavel, inklui (i) garantia empregu loron-100 kada tinan ba traballador sektór informál sira-hotu; (ii) pensaun universál; (iii) benefísiu inkapasidade ba ema hotu hotu ne'ebé iha inkapasidade; (iv) kobertura kuidadu saúde universál to'o 2030; (v) eskolarizasaun bázika universál to'o 2030; no (vi) asesu universál ba servisu enerjia modern to'o 2030.

Kalkulasaun ESCAP hatudu katak despeza hirak-ne'ebé presiza sei iha gama entre porsentu 5 no 8 hosi PIB. Ezersísiu simulasaun makroekonómiku hatudu katak investimentu hanesan ne'e sei la halo ameasa ba sustentabilidade fiskál no estabilidade presu, ne'ebé sei halo ida-ne'e hanesan aprosimasaun polítika manán-manán ba ema, planeta no ekonomia.